



ЖАМИЯТ

№ 28 (754)
2021 йил
8 июль,
Пайшанба

2006 йил 31 августдан
чоп этила бошлаган

Ижтимоий-сиёсий газета



www.bong.uz



[@jamiyatgzt@mail.ru](mailto:jamiyatgzt@mail.ru)



t.me/bonguz1



ФОЙДАНИ

КЎЗЛАБ

ЗИЁНГА...



ХАЛҚ БИЛАН БЎЛ, ЯША!



ФУҚАРОЛИК ЖАМИЯТИДАН РИВОЖЛАНИШНИНГ ЯНГИ БОСҚИЧИГА

ЭСКИ ШАҲАРНИНГ

ЯНГИ МУАММОЛАРИ




КИЧИК КОРХОНАНИНГ КАТТА МАРРАЛАРИ

«СИЁСАТГА

АРАЛАШМАНГ!»



ОДДИЙ КИШИЛАРНИНГ БУЮК МУҲАББАТИ



ҚИСКА
САТРАЛДАРДА
ЎҚИНГ!

Ўзбекистон ва хорижий ОТМларининг қўшма таълим дастурлари асосида таълимни ташкил этиш тартиби белгиланди.

Маълумки, мустақилликнинг дастлабки йиллариданоқ, республикамизда адолатли ҳуқуқий демократик давлат ва кучли фуқаролик жамияти барпо этиш масаласи олдимизга қўйилган устувор мақсадлардан бирига айланган.

Дарҳақиқат, ўтган йиллар давомида қабул қилинган “Ўзбекистон Республикасида жамоат бирлашмалари тўғрисида”ги (1991), “Нодавлат нотижорат ташкилотлари тўғрисида”ги (1999), “Жамоат фондлари тўғрисида”ги (2003), “Ҳомийлик тўғрисида”ги (2007), “Нодавлат нотижорат ташкилотлари фаолиятининг кафолатлари тўғрисида”ги (2007), “Экологик назорат тўғрисида”ги (2013), “Ижтимоий шериклик тўғрисида”ги (2014) Қонуналар, “Нодавлат нотижорат ташкилотларини, фуқаролик жамиятининг бошқа институтларини қўллаб-қувватлашни кучайтириш чора-тадбирлари тўғрисида”ги Олий Мажлис палаталари Кенгашларининг қўшма Қарори (2008), “Ўзбекистонда фуқаролик жамияти институтларини ривожлантиришга қўмаклашиш борасидаги чора-тадбирлар тўғрисида”ги (2005) ва “Фуқаролик жамияти институтларини ривожлантиришга қўмаклашиш борасидаги қўшимча чора-тадбирлар тўғрисида”ги (2013) Ўзбекистон Республикаси Президентининг Қарорлари ҳамда Ўзбекистон Республикаси Президентининг “Фуқаролик жамияти институтларини ривожлантиришга қўмаклашиш борасидаги қўшимча чора-тадбирлар тўғрисида”ги 2013 йил 12 декабрдаги қарорини амалга ошириш чора-тадбирлари ҳақида”ги Ўзбекистон Республикаси Вазирлар Маъкамасининг Қарори (2014), Ўзбекистон Республикаси Президентининг 2018 йил 4 майдаги “Мамлакатни демократик янгилаш жараёнида фуқаролик жамияти институтларининг ролини тубдан ошириш чора-тадбирлари тўғрисида”ги Фармони ва бошқа қатор меъёрий-ҳуқуқий ҳужжатлар мамлакатимизда фуқаролик жамияти институтларининг эркин, барқарор ва тизимли ривожланиши учун мустақам замин яратиб берди.

Ушбу меъёрий-ҳуқуқий ҳужжатларнинг изчил ва босқичма-босқич қабул қилиниши натижасида, йилдан йилга тегишли инфратузилма — шахс, жамият ва давлат ўртасидаги муносабатларда воситачи сифатида иштирок этувчи, фуқароларнинг турли ижтимоий манфаатларини рўёбга чиқаришга қўмаклашувчи қўллаб-қувватловчи нодавлат нотижорат ташкилотлари, жамоат ташкилотлари, бирлашмалари ва фондлари, касаба уюшмалари ва сиёсий партиялар, босма ва электрон оммавий ахборот воситалари ҳамда фуқаролик жамияти бошқа институтларининг фаолияти кучаймоқда ва такомиллашмоқда.

Бинобарин, давлат раҳбарининг ташаббуси билан қабул қилинган “2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегияси”да фуқаролик жамияти институтларини ривожлантириш, уларнинг ижтимоий ва сиёсий фаоллигини ошириш — давлат ва жамият қурилишини такомиллаштиришнинг асосий

йўналиши сифатида белгиланган.

Жорий йилнинг ойтда Президентимиз томонидан қабул қилинган “Нодавлат нотижорат ташкилотларини давлат томонидан қўллаб-қувватлаш, уларнинг фаолияти эркинлиги, ҳуқуқлари ва қонуний манфаатлари ҳимоя қилинишини таъминлашга оид қўшимча чора-тадбирлар тўғрисида”ги Қарор ҳамда “2021-2025 йилларда фуқаролик жамиятини ривожлантириш концепциясини тасдиқлаш тўғрисида”ги Фармон Ўзбекистонда фуқаролик жамиятини ривожлантиришнинг замонавий босқи-

чида янги саҳифани очиб берди.

Бугунги кунга келиб, Ўзбекистонда 10 мингга яқин нодавлат нотижорат ташкилотлари давлат органлари билан бир қаторда ижтимоий шериклик таъминлаши асосида стратегик жиҳатдан муҳим аҳамият касб этувчи мақсадларни амалга ошириш йўлида самарали фаолият кўрсатмоқда.

Таъкидлаш лозимки, юқорида қайд этилган қарорга кўра, 2021 йил 1 март-

Хусусан, нодавлат нотижорат ташкилотлари ва фуқаролик жамиятининг бошқа институтларини давлат томонидан субсидиялар, грантлар ва ижтимоий буюртмалар шаклларида қўллаб-қувватлаш ҳажмини 2021 йилда камида 1,2 бараварга, 2025 йилда 1,8 бараварга ошириш кўзда тутилмоқда.

дан эътиборан нодавлат нотижорат ташкилотлари томонидан рўйхатдан ўтказувчи органни хабардор қилган (маълумот учун) ҳолда хорижий манбалардан олинган пул маблағлари ва мол-мулкнинг бир календарь йилидаги жами суммаси базавий ҳисоблаш миқдорининг 20 бараваридан 100 бараваригача оширилди, нодавлат нотижорат ташкилотини қайта рўйхатдан ҳамда унинг рамзини давлат рўйхатидан ўтказиш муддати 1 ойдан 15 кунгача қисқартирилди.

Мазкур ҳужжатга мувофиқ, эндиликда ногиронлиги бўлган шахслар, фахрийлар, нурунийлар, хотин-қизлар, болалар жамоат бирлашмалари рамзларини давлат рўйхатидан (қайта рўйхат-

дан) ўтказиш учун давлат божи ундирилмайди.

Шунингдек, Президент қарори билан нодавлат нотижорат ташкилотининг алоҳида бўлинмаси юридик шахс ҳисобланади, бунда алоҳида бўлинмаларни ҳисобга қўйиш тартиби бекор қилинди.

Шу билан бирга, ўз фаолиятини вилоят, туман, шаҳар, шаҳарча, қишлоқ ва овул ҳудудида олиб борадиган ННТ ҳудудий нодавлат нотижорат ташкилотлари ҳисобланиб, уларни давлат рўйхатидан ўтказиш учун БҲМнинг 50 фоизи миқдоридан давлат божи ундирилади.

Фармонга кўра, бир қатор ННТлар учун муҳим мақсадли кўрсаткичлар белгиланганини алоҳида таъкидлаб ўтиш ўринлидир.

Хусусан, нодавлат нотижорат ташкилотлари ва фуқаролик жамиятининг

рилган ишлар, ижтимоий шериклик даражаси, ажратилган субсидия, грант ва ижтимоий буюртмалар натижадорлиги ва бошқа муҳим фаолият кўрсаткичларига асосан уларнинг рейтингини тузилади.

Нодавлат нотижорат ташкилотлари фаолиятининг очиқлик индекси Ўзбекистон Республикаси Президентини ҳузурдаги Жамоатчилик палатаси, Ўзбекистон нодавлат нотижорат ташкилотлари миллий Ассоциацияси ва Адлия вазирлиги томонидан белгиланган тартибда шакллантирилади ва индекс натижалари уларнинг расмий веб-сайтларида эълон қилинади.

Бундан ташқари, Очиқлик индекси натижаси бўйича “энг шаффоф нодавлат нотижорат ташкилотлари топ-20” ва “энг фаол нодавлат нотижорат ташкилотлари топ-20” рўйхатлари



бошқа институтларини давлат томонидан субсидиялар, грантлар ва ижтимоий буюртмалар шаклларида қўллаб-қувватлаш ҳажмини 2021 йилда камида 1,2 бараварга, 2025 йилда 1,8 бараварга ошириш кўзда тутилмоқда.

Ўзбекистон нодавлат нотижорат ташкилотлари миллий Ассоциацияси аъзолари сонини жами фаолият кўрсатаётган нодавлат нотижорат ташкилотлари сонига нисбатан 2021 йилда 10 фоизга, 2025 йилда 30 фоизга етказиш белгиланиб, нодавлат нотижорат ташкилотлари томонидан юқори турувчи ташкилотларга қонунчиликни такомиллаштириш юзасидан киритилган тақлифларнинг умумий сонини 2021 йилда 1000 тага, 2025 йилда 5 000 тага етказилишини таъминлаш вазифаси қўйилмоқда.

Қорақалпоғистон Республикаси Жўрқорғи Кенгеси, Халқ депутатлари вилоятлар ва Тошкент шаҳар Кенгашлари ҳузурдаги нодавлат нотижорат ташкилотларини ва фуқаролик жамиятининг бошқа институтларини қўллаб-қувватлаш Жамоат фондларига 2021 йилда 16 миллиард сўм, 2025 йилда 70 миллиард сўм миқдоридан маблағлар ажратиш, жорий 2021 йилда 50 та, 2025 йилда эса 250 та нодавлат нотижорат ташкилотлари раҳбарларини Президент ҳузурдаги Давлат бошқаруви Академиясида қайта тайёрлаш ва уларнинг малакасини ошириш режалаштирилган.

Шу билан бирга, 2021 йил 1 апрелдан бошлаб нодавлат нотижорат ташкилотлари фаолиятининг очиқлик индекси жорий қилинади ва унга кўра ҳар йил якунлари бўйича нодавлат нотижорат ташкилотлари томонидан амалга оши-

шакллантирилади.

Шаффофлик стандартини жорий этган нодавлат нотижорат ташкилотларини белгиланган тартибда рағбатлантириш чоралари кўрилади, улар томонидан амалга оширилган ижобий ишлар жамоатчилик ўртасида кенг омалаштирилади.

Шу билан бир қаторда, Фармонга мувофиқ ННТларнинг моддий-техник базани (оргтехника, компьютер, бошқа техник воситалар, бино билан таъминлаш ҳамда бошқалар) мустақамлашга белгиланган тартибда қўмак берилади ҳамда давлат органлари ва ҳалқаро ташкилотлар билан ҳамкорлик алоқаларини кенгайтириш чоралари кўрилади.

Муҳтасар айтганда, юқорида зикр этилган ҳужжатларнинг қабул қилиниши юртимизда “Кучли давлатдан — кучли фуқаролик жамияти сари” концептуал жараёнларни амалиётда янада фаоллашувида, фуқаролик жамияти институтларининг барча тизимларини ривожлантириш ва мустақамлаш, ННТларнинг давлат томонидан қўллаб-қувватланиши билан боғлиқ ишларни сифат жиҳатдан янги босқичга кўтариш, аҳоли турли катламлари вакилларининг ижтимоий-сиёсий фаоллигини юксалтириш, энг асосийси, фуқароларнинг жойларда амалга оширилаётган ислохотлар жараёнларига шахсий дахлдорлик туйғусини янада кучайтиришда муҳим омил бўлиб хизмат қилади.

Сарвар МАМАНОВ,
Фаррух ФАХРИДДИНОВ,
ЎзННТМА Ҳудудий бўлинмалар ва аъзолар фаолиятини мувофиқлаштириш бўлими бош мутахассислари



ХАЛҚ БИЛАН БЎЛ, ЯШСА!

Давлат ва жамият ҳаётининг барча соҳаларини тубдан янгилашга қаратилган инновацион ривожланиш йўлига ўтмоқдамиз. Бу бежиз эмас, албатта. Чунки давр шиддат билан ривожланиб бораётган ҳозирги замонда ким ютади? Янги фикр, янги ғояга, инновацияга таянган давлат ютади. Инновация бу – келажак дегани. Сирасини айтганда, буюк келажакимизни барпо этишни бугундан бошлайдиган бўлсак, уни айнан инновацион ёндашув асосида бошлашимиз керак...

Ислоҳотларга дахлдорлик туйғуси

Шу аснода, Президент виртуал қабулхонаси бошқаруви органлари фаолиятининг самарадорлиги кўрсаткичи, ҳудудлардаги муаммоларни чуқур таҳлил этиш ҳамда ҳал қилиш механизми сифатида муҳим аҳамият касб этаётир. Виртуал қабулхона кейинги давр мобайнида аҳолини ташвишга солаётган масалаларни ечиш бўйича энг мақбул воситага айланди. Буни мурожаатлар кўлами ҳам тасдиқлайди. Давлат статистика қўмитасининг хабар беришича, бугунги кунга келиб, фуқаролардан бир миллиондан зиёд мурожаат келиб тушган. Улардан 94 фоизи кўриб чиқилган. Шундай қилиб, давлат органлари ва мансабдор шахсларнинг жамият олдига жавобгарлик тамойили амалда рўёбга чиқарилмоқда. Инчунин, фуқароларнинг мамлакатда амалга ошириляётган ислоҳотларга дахлдорлик туйғуси кучайяпти. Бу эса давлат ва халқ муносабатларидаги ўзаро ишончнинг мустаҳкамланишида, жамиятнинг бар- қарорлиги ва тараққиётида муҳим омил бўлиб хизмат қилаётир. Энг муҳими, экспертлар аҳоли тафаккурида, дунёқарашида ижобий ўзгаришлар юз бераётганини қайд этияпти.

Давлатимиз раҳбарининг 2019 йил 19 февралдаги “Ўзбекистон Республикаси Президентининг Халқ қабулхоналари фаолияти билан боғлиқ Низомларни тасдиқлаш тўғрисида”ги қарори мазкур йўналишдаги ишларни янги босқичга кўтарди. Хусусан, мазкур ҳужжат асосида иш бошлаган Чилонзор тумани Халқ қабулхонаси томонидан ҳам ҳар бир мурожаатга алоҳида эътибор қаратилган ҳолда масалаларни ижобий ҳал қилиш ва фуқароларни рози қилиш чоралари кўрилмоқда.

— Қабулхонамизга 2021 йилнинг 1 июнига қадар 579 та мурожаат келиб тушган, — дейди Шавкат Мирзажонов. — Виртуал тизим орқали назоратга олинган мурожаатлар турли ташкилотларга ижро учун юборилиб, ҳал қилишнинг ижобий чоралари кўриляпти. Таҳлил натижаларига кўра, мурожаатларнинг 48 фоизи ечимини топган. Шунингдек, 19 таси асосли деб топилиб, муддатли назоратга олинган. Юқоридаги рақамларни ўтган йилги кўрсаткичларга таққослаганда жуда

катта фарқни кўриш мумкин. Яъни 2020 йил 250 та масала келиб тушган бўлиб, 112 таси ижобий ҳал қилинган. Мурожаатлар соҳалар кесимида таҳлил қилинганда, 62 та моддий ёрдам олиш, 46 таси уй олдига ҳудудларни ободонлаштириш, 30 таси дори-дармон билан таъминланиш, шунингдек, уй-жой ва иш билан таъминлаш масаласида мурожаат қилинган.

Кўряпмизки, кўпгина фуқаролар коммунал хизматлардан, хусусан, газ, электр ва сув таъминотидан шикоят қилишган, шунингдек, иш билан таъминлаш ва бандлик масалаларида мурожаатлар келиб тушган. Чилонзор тумани Қизил шарқ мавзеси 18 уй 61 хонадонда яшовчи Ҳожиакбар Муҳаммадзоновдан уйининг ертўласида узоқ вақтдан буён канализация қувурлари тешилгани сабаб сув оқаётгани, натижада, ертўла сувга тўлгани айtilган мурожаат хати келиб тушган эди. Ушбу масалани сектор ходимлари ўрганиб, ижобий тарзда ҳал қилди. Аҳоли билан тўғридан-тўғри мулоқотни ташкил этиш, жисмоний ва юридик шахсларнинг ҳуқуқ-эркинликлари ва қонуний манфаатларини тўлақонли ҳимоя қилишга қаратилган уйма-уй юриш, ижтимоий ва бошқа объектларни ўрганиш орқали муаммоларни аниқлаш ва ҳал қилиш, шунингдек мурожаатлар билан ишлашнинг самарали тизими бугун ўз натижасини ҳар жабҳада кўрсатаяпти. Юқорида келтирган мисолларимиз гапимизнинг тўлақонли тасдиғи бўлади.

Халқ билан мулоқотнинг ёрқин самараси

“...ҳаммамиз тушунамизки, халқ билан мулоқот одамларнинг ичига кириш, уларнинг дард-у ташвишлари билан яшаш, инсон манфаатларини таъминлаш — бу биз учун фақат бир йиллик иш эмас.

Бу масала келгуси беш йиллик фаолиятимизда ҳам энг устувор вазифа бўлиб қолади ва бу ҳақиқатни ҳаммамиз чуқур тушуниб, яхши англаб олишимиз шарт. Чунки биз юртимизда янги давлат, янги жамият қуриш йўлида қандай иш қилсак, уларнинг барчасини халқимиз билан бамаслаҳат қиламиз”, дейди

Давлатимиз раҳбари.

Ҳақиқатан ҳам, тараққиётнинг бугунги босқичи амалга ошириляётган кенг кўламли ислоҳотлар самарадорлигини янада сезиларли - амалий тус олдиришда халқ билан мулоқотни изчил йўлга қўйилишини талаб этмоқда. Президентимизнинг 2019 йил 19 январдаги “Аҳоли билан ишлаш тизими янада такомиллаштириш чора-тадбирлари тўғрисида”ги Фармони талабларига кўра Республика ишчи гуруҳи томонидан Чилонзор туманида ўтказилган аҳоли билан тўғридан-тўғри мулоқотни ташкил этиш, жисмоний ва юридик шахсларнинг ҳуқуқ-эркинликлари ва қонуний манфаатларини тўлақонли ҳимоя қилишга қаратилган тадбирлар натижасида жами 1550 та муаммо аниқланган. Улардан 1284 таси, яъни 83 фоизи баргараф этилди. Мазкур тизимнинг давлатимиз раҳбари ташаббуси билан ташкил этилган ва амалда муносиб самара берган Халқ қабулхоналари негизида барпо этилган аҳамиятлидир. Чунки шу жамиятда яшаётган ҳар бир фуқаро ҳаёти давомида турли эҳтиёжлар билан давлат

« Аҳоли билан тўғридан-тўғри мулоқотни ташкил этиш, жисмоний ва юридик шахсларнинг ҳуқуқ-эркинликлари ва қонуний манфаатларини тўлақонли ҳимоя қилишга қаратилган уйма-уй юриш, ижтимоий ва бошқа объектларни ўрганиш орқали муаммоларни аниқлаш ва ҳал қилиш, шунингдек мурожаатлар билан ишлашнинг самарали тизими бугун ўз натижасини ҳар жабҳада кўрсатаяпти. Юқорида келтирган мисолларимиз гапимизнинг тўлақонли тасдиғи бўлади.

идораларига дуч келиши табиий ҳол. Халқнинг давлат идоралари билан муносабатларида енгиллик яратиш, мушкулни осон қилиш эса бугунги кунда давлатимизнинг асосий эътибор марказига кўтарилган. Давлат хизматлари кўрсатишнинг янги, замонавий концепциясида фуқароларнинг навбат кутиб туришларини кескин камайтириш, ҳужжатларни электрон тарзда юритиш ҳисобига қоғозбозликни қисқартириш, турли хил буйруқбозлик ва сансоларликларга чек қўйиш кўзда тутиляпти. Энг муҳими, давлат хизматлари марказларининг иш принципи “Фуқаролар эмас, ҳужжатлар ҳаракатланади” деган тамойилга асосланган.

Шунингдек, Чилонзор туманидаги Халқ қабулхонаси томонидан “Обод маҳалла” дастури доирасида Катта Чилонзор-2 маҳалласида амалга ошириляётган ишлар мониторинги олиб борилиб, мавжуд муаммо ва камчиликлар юзасидан тегишли чоралар кўрилмоқда. Ҳозирги кунга қадар маҳаллада 324 метр иссиқлик тармоқларидан 150 метри алмаштирилди. 26 тонна чиқинди олиб кетилиб, 15500 метр квадрат уйнинг ташқи деворлари сувалди.

Сўнги икки-уч йилда дунё аҳолиси орасида турли касалликлар аниқланмоқда. Аҳолига фақат марказ биноларида хизмат кўрсатиш билан чекланиб қолмасдан, сайёр тартибдаги хизматларни йўлга қўйиш ҳам бугунги кунда долзарб аҳамият касб этмоқда. Айниқса, чекка қишлоқларда истиқомат қилувчи фуқаролар туман марказига бориб келишга кўпинча қийналади. Давлат хизматлари марказлари ходимлари тез-тез қишлоқларга, маҳалларга чиқиб, шу жойнинг ўзида аҳолига хизмат кўрсатишни ташкил қилса, фуқароларнинг яна бир мушкул осон бўлади. Инчунин, тиббий хизмат кўрсатиш соҳасига бўлган талаб ҳам юқори. Шуларни инобатга олган ҳолда юртимизнинг кўплаб ҳудудларида аҳолини тиббий кўриқдан ўтказиш, касалликларнинг эрта олдини олиш мақсадида сайёр тиббий кўриқлар ўтказилмоқда. Ана шу хайрли ташаббусларнинг узвий давоми сифатида “Саховат ва кўмак” жамғармаси ташкил этилиб, эҳтиёжманд, яқка-ёлғиз кексалар ҳамда “Темир дафтар”, “Аёллар дафтари” га рўйхатда турган жами 30 нафар фуқарога моддий ёрдам ажратилди. 26 нафар фуқарога 1 миллион сўмдан, 2 нафар фуқароларга кир ювиш машинаси, 1 нафар фуқарога ногиронлик аравачаси берилди. Халқ қабулхонаси ва ҳудуддаги 34-сонли оилавий поликлиника билан ҳамкорликда Катта Чилонзор-2 маҳалласида ҳам кўриқ ўтказилди. Кўриқ давомида 92 нафар аҳолининг касалликлари аниқланиб, керакли муолажалар белгиланди. Мамлакатимизда амалга ошириляётган бу каби тадбирлар

одамларда миннатдорлик ҳиссини уйғотмоқда. Лекин мазкур ислоҳотлар моҳиятини ҳамма ҳам бирдай тушунапти деб бўлмайди. Айрим идораларда ҳали ҳам сусткашлик, ўзбиларчилик, янгиларга панжа орасидан қараш ҳоллари, афсуски, учраб турибди. Аксарият ташкилотларнинг ахборот тизимлари ва маълумотлар базалари яратилмаган, шу сабабли уларни ягона тизим билан интеграция қилиш имконияти қийин кечмоқда.

Юртбошимиз томонидан илгари сурилган “Халқ давлат идоралари учун эмас, балки давлат идоралари халқимиз учун хизмат қилиши керак”, деган ғоя бугун ҳаётимизнинг асосий мазмунига айланиб бораётган экан, буни ҳар биримиз муносиб англаган ҳолда шунга монанд ишлашимиз керак. Мамлакатимизда қандай ислоҳотлар жорий этиляётган бўлса, буларнинг барчаси одамларнинг бугунги ва эртанги ҳаёти фаровон бўлишини таъминлаш, халқимизни ҳаётдан рози қилишдек улғу мақсадга қаратилган. Бинобарин, халқ розилиги тараққиёт локомотиви бўлиб хизмат қилади.

Муроджон РАҲМАТОВ



КИЧИК КОРХОНАНИНГ КАТТА МАРРАЛАРИ

“Микрокредитбанк” акциядорлик-тижорат банки бугунги кунда ўзининг хорижий кредит линиялари орқали жалб қилинган маблағлари билан иқтисодиётнинг реал сектори корхоналарини модернизация қилиш, техник ва технологик қайта жиҳозлаш ҳамда ишлаб чиқаришни диверсификациялашга доир инвестиция лойиҳаларини молиявий қўллаб-қувватлашга қаратилган жараёнларда фаол иштирок этмоқда.

Мазкур саъй-ҳаракатлар кўламини кенгайтириш мақсадида “Микрокредитбанк” АТБ томонидан молиялаштирилган Фарғона вилоятининг Фарғона шаҳридаги “Afrosiyobfarm” МЧЖга ҳамда Қўқон шаҳридаги “KOKAND BICYCLES” МЧЖга бир гуруҳ республика ва маҳаллий оммавий ахборот воситалари вакиллари иштирокида пресс-тур ташкил этилди.

Пресс-тур давомида иштирокчилар фармацевтика ва антисептик маҳсулотларини ишлаб чиқариш жараёнлари, велосипедлар ишлаб чиқариш техникаси қандай бўлиши билан бевосита яқиндан танишиш имконига эга бўлишди. Жумладан, журналистларнинг биринчи манзили – Фарғона шаҳридаги “Afrosiyobfarm” МЧЖ фармацевтика ва антисептик маҳсулотлари ишлаб чиқарувчи корхона бўлди.

“Afrosiyobfarm” МЧЖ фармацевтика ва антисептик маҳсулотлари ишлаб чиқариш фаолиятини ташкил этиш бўйича умумий қиймати 1,4 миллион АҚШ доллари бўлган лойиҳа ҳисобланади. Унга “Микрокредитбанк” АТБ томонидан фармацевтика ва антисептик маҳсулотлари ишлаб чиқариш, замонавий ускуналар сотиб олиш учун



60 ой муддатга 12 ой имтиёзли давр билан 1 миллион АҚШ доллари миқдоридан кредит ажратилган.

“Afrosiyobfarm” МЧЖда бугунги кунда кредит ҳисобига сотиб олинган фармацевтика ва антисептик маҳсулотлари ишлаб

чиқариш ускуналари тўлиқ олиб келиб, ўрнатилган ва антисептик воситалар ишлаб чиқариш бошланган.

Ҳозирда корхонада 22 нафар янги иш ўринлари яратилётган бўлса, корхона тўлиқ қувват билан ишлаганда янги иш ўринлар сони 40 нафарга етказилиши режалаштирилган.

“Afrosiyobfarm” МЧЖнинг мазкур лойиҳаси ишга туширилиши натижасида медицина спирти, йод, бриллиант кўки (зелёнка), перекс, менавазалин, глицирин каби маҳсулотлар ишлаб чиқариш йўлга қўйилади.

Мазкур лойиҳага кўра, йилига 13 200 000 дона фармацевтика маҳсулотлари ишлаб чиқариб, сотиш натижасида 1 993 736,84 АҚШ доллари тушумга эга бўлади.



“KOKAND BICYCLES” МЧЖга велосипедлар ишлаб чиқаришга эҳтиёт қисмлари сотиб олиш учун “Микрокредитбанк” АТБ томонидан 36 ой муддатга 12 ой имтиёзли давр билан 870 000,0 ЕВРО миқдоридан кредит ажратилган.



Бугунги кунда “KOKAND BICYCLES” МЧЖда моторсиз велосипедлар ва бошқа шу каби транспорт воситалари, жумладан уч филдиракли велосипедлар, тандемлар, болалар велосипедларини ишлаб чиқариш йўлга қўйилган.

Корхона 2020 йилнинг 1 июнидан бошлаб ишга туширилган. Лойиҳа қувватининг ошиб боришига қараб



3 йилда ишлаб чиқаришдан жами 7,5 миллион ЕВРО тушум, шундан 1,8 миллион ЕВРО соф фойда олиш режалаштирилган.

Маълумот учун, “Микрокредитбанк” АТБ томонидан жорий йил бошидан бери тадбиркорлик субъектларининг инвестицион лойиҳаларини молиялаштириш учун 121 та лойиҳага 890 миллиард сўм эквивалентида маблағ ажратилди. Шунингдек, йил якунига қадар банк томонидан истиқболли лойиҳаларни молиявий қўллаб-қувватлаш борасида ишлар олиб борилмоқда.

Банк ахборот хизмати.





Худудий деҳқон бозорларида аҳоли учун бирламчи маҳсулотлар доимий равишда ветеринария лабораториялари кўригидан ўтказилмоқда.

Айни пайтда Андижон вилоятининг туман ва шаҳарларида жойлашган мавжуд деҳқон бозорларида 20 та ветеринария-санитария экспертиза лабораториялари фаолият кўрсатяпти.

Давлат ветеринария хизмати ходимлари томонидан ўтган ҳафта давомида 108887 кг йирик шохли мол гўшти, 15807 кг майда шохли мол гўшти, 29863 кг парранда гўшти, 660513 дона

АНДИЖОН ВИЛОЯТИДА ОЗИҚ-ОВҚАТ МАҲСУЛОТЛАРИ ХАВФСИЗЛИГИНИ ТАЪМИНЛАШ ЧОРА-ТАДБИРЛАРИ

тухум, 2524 кг асал, 19128 кг сут ва сут маҳсулотлари, 801419 кг ўсимлик маҳсулотлари ҳамда 441511 кг полиз экинлари маҳсулотлари ветери-



нария лабораториялари кўригидан ўтказилди.

Текширувлар давомида 80 кг чорвачилик маҳсулотлари, 215 дона тухум, 9 кг сут ва сут маҳсулотлари, 80 кг полиз экинлари маҳсулотлари ҳамда 184 кг ўсимлик маҳсулотларининг истеъмолга яроқсизлиги аниқланиб, белгиланган тартибда зарарсизлантирилди.

БАЛИҚЧИЛИК ТАРМОҒИНИ

РИВОЖЛАНТИРИШ БЎЙИЧА АНГЛАШУВ

МЕМОРАНДУМИ ИМЗОЛАНДИ

Ўзбекистон Республикаси ва Туркия Республикаси ўртасидаги савдо-иқтисодий ҳамкорлик бўйича Ҳукуматлараро комиссиясининг олтинчи йиғилиши бўлиб ўтди.

Йиғилиш доирасида Туркия Республикаси Қишлоқ ва ўрмон хўжалиги вазирлиги ҳамда Ўзбекистон Республикаси Ветеринария ва чорвачиликни ривожлантириш давлат қўмитаси ўртасида балиқчилик соҳасини ривожлантириш бўйича ҳамкорлик қилиш тўғрисида ўзаро Англашув меморандуми имзоланди.



Мазкур Меморандумга асосан қуйидаги йўналишларда фаол ҳамкорликни амалга ошириш кўзда тутилмоқда:

- сувда яшовчи тирик ресурсларни самарали сақлаш, барқарор ривожлантириш ва улардан оқилона фойдаланиш;
- сувда яшовчи тирик ресурслар ва уларнинг табиий яшаш шароитларини баҳолаш бўйича қўшма илмий тадқиқотлар ўтказиш;



- илмий ва давлат ташкилотлари ўртасида саноат соҳасидаги илмий маълумотларни алмашиш;
- мутахассислар учун тренинглар ва ўқув-семинарларини ташкил этиш;
- балиқчилик ва аквакултура соҳаларида ўзаро билим ва тажриба алмашиш;
- Мазкур йўналишлардаги ҳамкорликни ташкил этиш ва мувофиқлаштириш мақсадида меморандумда томонлар ўртасида Балиқчилик қўшма қўмитасини таъсис этиш.

Таъкидлаш жоизки, ушбу ҳамкорлик балиқчилик тармоғини янада ривожлантиришга кенг йўл очади.

БУХОРО ВИЛОЯТИДА ҲАЙВОНЛАР КАСАЛЛИКЛАРИГА ҚАРШИ КУРАШ БЎЙИЧА ТАКТИК МАШҒУЛОТЛАР ОЛИБ БОРИЛДИ

Бухоро вилоятининг Қорақўл туманида ҳамкор ташкилот ходимлари иштирокида “Ўта хавфли куйдирги касаллигининг пайдо бўлиши ва тарқалишини олдини олиш” мавзусида ўқув-амалий семинар ўтказилди.



Унда Давлат ветеринария хизмати, Фавқуллодда вазиятлар, Соғлиқни сақлаш бошқармалари ва Санитария эпидемиологик осойишталик маркази ходимлари иштирок этишди.

Тадбир давомида куйдирги касаллиги пайдо бўлганда унга қарши кураш ва олдини олиш бўйича ҳамкор ташкилотлар ходимлари томонидан амалга ошириладиган муҳим чора-тадбирлар юзасидан махсус-тактик машғулотлар олиб борилди.

Ветеринария ва чорвачиликни ривожлантириш давлат қўмитаси Ахборот хизмати





ЭСКИ ШАХАРНИНГ ЯНГИ МУОММОЛОРИ

“Миллионли Самарқандни ким ва қандай бошқаради?” сарлавҳали катта мақола ёзмоқчиман. Шу муносабат билан ҳамшаҳарлар ва шаҳримиз меҳмонларини, умуман, дунёга машҳур бу кўҳна кентнинг бугуни ҳақида фикр-мулоҳаза билдирмоқчи бўлганларни даврага таклиф этаман.

Самарқанднинг сўнгги йиллардаги аҳволи ҳақида гап кетганда, аксарият одамлар ҳақоратомуз сўзларни ишлатади. Бундан эзиласан киши, юраклар тугёнга келади. Шу ўринда савол туғилади. Ярим миллион аҳолиси бўлган пайтда бошқарувни эплолмаганлар қандай қилиб бундан икки баравар катталашган шаҳарни рисоладагидек бошқаради?

Биламан, ёзганларим айрим “лаганбардор” эътирозига сабаб бўлади. Каминани ноҳолисликда айблаши ҳам мумкин. Бўлажак мақолада айганларим исботи сифатида мисоллар келтираман. Шунингдек, ушбу чиқишимга ижтимоий тармоқларда билдириладиган ҳолис фикрлар ҳам ўз курсиси ва амали билан сармаст бўлиб қолган амалдорларга шаҳримиз файзини йўқотиб бораётганлигини кўрсатадиган асос бўлади деб ўйлайман.

Мана, айрим мисоллар.

Нега битта шаҳарда икки-учта бир хил номдаги кўчалар бор? Нега ўнлаб кўчалар номсиз, минглаб ҳовлилар рақамсиз?

Бундан 9 йил аввал Самарқанд туманидан шаҳарга ўтган 30 дан ортиқ маҳалла ва кўчаларга ном қўйиш ва уйларни рақамлаштиришга қанча вақт керак? Биламан, бу ҳақда кўп гапирилмоқда, аммо одамларга натижа керак. Шинам кабинетнинг юмшоқ курсисига ўтириб олганлар мавжуд тартиб, аниқроғи тартибсизлик аҳолини қанчалик қийнаётганлигини билишадими? Масалан, мол-мулк ва ер солиқларини тўламоқчи бўлганларни солиқ инспекцияси Давлат хизматлари марказига юборади. Бу ердан фуқаро яшайдиган кўчасининг номи ва уй рақамини келтиришни сўраб, Кадастр агентлиги Самарқанд шаҳар бўлимига жўнатади.

Кадастр агентлиги фуқарога маҳалласига бориб, кўчасининг номи ва уй рақами ҳақида маълумотнома келтиришни талаб қилади. Бу, биринчидан, бугунги қонун талабларига зид. Иккинчидан, Кадастр агентлигининг ўзи қайси кўча номланмаган ва уйлари рақамламаган-

лигини билиши керак эмасми? Уйларни рақамлаш уларнинг иши-ку! Мана, бизнинг Богимайдон маҳалламизга агентликнинг икки нафар ходими тўрт ойча олдин келиб, уйларни рақамлаштириш ишларини бошлаган эди. Аммо охирига етказмасдан чала қолдирди.

Кўчалар номланмаганлиги яна қанча идора ва фуқаролар овозгарчилигига сабаб бўлмоқда. Солиқ, суд, прокуратура ва бошқа идоралардан, хориждан, халқаро ташкилотлардан келадиган мактубларда кўча номи ёзилмасдан Богимайдон маҳалласи кўрсатилади. Кўп ҳолларда бундай мактубларни орқага қайтаришга мажбур бўламиз. Чунки турли даврларда Регистон мажмуи орқасидаги маҳалла ва Расадхона МФЙ ҳам ана шу ном билан аталган. Аввалги Заргарон кўчаси ҳозир Богимайдон деб аталмоқда.

Бу шаҳар бошқарув тизимидаги пала-партишликдан бир мисол. Э-ҳе, бундай мисоллар қанча! Бирданга шунча кўчаю йўлларни бузиш зарурми? Нега асфальт ётқизилганлигига ҳали уч йил бўлмаган Ибн Сино кўчаси ковланиб, асфальти шағали билан чиқарилиб, ўрнига яна шунча шағал тўкиб асфальт қилинмоқда? Айтишларича, ана шу йўл-сознинг ўзи бундан сал аввал йўлни фойдаланишга қабул қилиб олган экан.

Билмадим, чинданми ё ҳазилми айримларнинг “эрта-индин йўл ва сув ти-

зимини модернизация қилишга араблар ажратган 300 миллион доллар харажат қилиб бўлингач, ишлар тўхтади, шаҳарда юриш имкони туғилади” деган сўзлари ҳам кулоққа чалинмоқда.

Яна бир мисол. Шаҳарга доир муаммони шаҳар ҳокимлиги ҳал қилсин, вилоят ҳокимининг иши бошидан ошиб ётибди, деган хаёл билан маҳалламиздаги ярим гектарлик Шайх Сўхий мазори ва унинг атрофини ободонлаштириб, зиёратгоҳ ва бир четини ҳордиқ чиқариш масканига айлантириш таклифи билан чиққан эдик. Мана, бир ой бўлибдики, ҳокимликдан дарак йўқ.

Вилоят ҳокими Эркинжон Оқбўтаевич, ушбу ёзганларимдан хабар топиб, бир маҳалламизга келсангиз эди... Шундайгина Обираҳмат ёнида бу сердарахт жойни замонавий масканга айлантириш бўйича мутахассислар тавсияси керак. Ободонлаштириш ва қурилиш ишларини маҳалламиз тадбиркорлари ўз зиммасига олади.

Самарқанднинг ҳозирги аҳволи ва уни тузатиш бўйича фикр-мулоҳаза ва таклифлар билдирсангиз, ҳокимликдагилар уларни инобатга олиб, ҳаракат қилса, балки шунда шаҳримизнинг файзу таровати ва хусну малоҳати биз у билан фахрлана оладиган даражага етар?!

Тошпўлат РАҲМАТУЛЛАЕВ

Диққат, танлов!



Ўзбекистон Журналистлари ижодий уюшмаси, Маданият вазирлиги,

Ёзувчилар уюшмаси, Республика

“Тасвирий ойна” ижодий уюшмаси,

Миллий телерадиокомпания, Ўзбекистон

Миллий ахборот агентлиги, Ўзбекистон

Республикаси Кинематография агентлиги

ҳамда Бадий академия мамлакатимиз

мустақиллигининг ўттиз йиллигига

бағишланган

“ЭНГ УЛУҒ, ЭНГ АЗИЗ”

республика танловини эълон қилади.

Танловга “Янги Ўзбекистонда эркин ва фаровон яшайлик!” деган бош ғояни ўзида мужассам этган асарлар-материаллар қабул қилинади.

“Энг улуг, энг азиз” танлови қуйидаги номинациялар бўйича ўтказилади:

- ёзувчи ва шоирларнинг бадиий асарлари;
- босма ОАВ ходимларининг журналистик ишлари;
- телевидение ва радио ижодкорларининг материаллари;
- интернет-журналистика;
- тасвирий санъат, фото асарлари ва дизайн ишлари;
- кино санъати асарлари.

Танловга тақдим этилган ижодий ишларга қуйидаги ҳужжатлар илова қилиниши лозим:

- муаллиф ва унинг профессионал фаолияти тўғрисида қисқача маълумот (объективка);
- муаллифнинг паспорт нусхаси;
- иш жойидан тавсиянома;
- муаллифнинг манзили ва боғланиш телефонлари.

Танловга 2020 йилнинг 1 августидан 2021 йилнинг 1 августигача бўлган даврда эълон қилинган материаллар – асарлар жорий йилнинг 1 августигача қабул қилинади.

Танлов голиблари Ватанимиз мустақиллигининг ўттиз йиллик байрами арафасида мукофотландилар ва уларнинг рўйхати матбуотда эълон қилинади.

Ижодий ишлар “Энг улуг, энг азиз” танловига деб кўрсатилган ҳолда ўз ижодий йўналишлари бўйича қуйидаги манзилга юборилиши лозим:

Ўзбекистон Журналистлари ижодий уюшмаси, 100011.

Тошкент шаҳри Навоий кўчаси 30-уй.

Тел.: 71-244-64-61.

Ўзбекистон “Тасвирий ойна” уюшмаси, 100011.

Тошкент шаҳри Навоий кўчаси 30-уй.

Тел.: 71-244-11-64.

Ўзбекистон Ёзувчилар уюшмаси, 100066,

Тошкент шаҳри Бунёдкор кўчаси Адиблар хийбони.

Тел. 71-231-83-49

Ўзбекистон Республикаси Кинематография

агентлиги, 100115, Тошкент шаҳри

Чилонзор кўчаси 1 “А” уй.

Тел. 71-277-81-49.

Бу ибора қачон, қандай пайдо бўлганини билмадим, аммо бугунги кунда ҳам негадир кўп ишлатилади. Шу даражага етдики, ўзини қизиқтирган саволга жавоб олишни истаган ҳар қандай одам кўпинча «Сиёсатга аралашмасанг-чи» қабалидаги жавобни эшитади. Аслида, бу жавобнинг «Сиёсий билимингни оширишга ҳаракат қилма» деган гапдан мазмунан кўпам фарқи йўқ.

Бу иборанинг кўп ишлатилишига эътиборингизни қаратдик. Ўз-ўзидан савол туғилади — нима, биз сиёсатга шунчалик ҳам кўп аралашаяпмизми? Умуман, сиёсатга аралашини нима ўзи? Бу яхшими, ёмонми? Агар ёмон бўлса, унда нима сабабдан ҳокимият органлари фаолиятининг очиқлигини таъминлашга ҳаракат қилаяпмиз? Ҳар қандай фуқаронинг истаган давлат ҳокимияти ва бошқаруви органидан керакли маълумотни тўсиқсиз олишига шароит яратишдан мақсад нима? Демак, бизга сиёсий саводли фуқаролар керак. Мақола сарлавҳасидаги ундалма ўринсиз. Бу гапни айтувчиларга фикрлари нотўғри эканлигини тушунтиришимиз бугунги кунда ҳамма нарсадан муҳим.

Авалло, шуни айтишимиз керакки,

давлат сиёсати бу бизнинг сиёсатимиз. Унинг қандай бўлиши бизга ҳам боғлиқ. Ўзбек тилининг изоҳли луғатида сиёсат сўзига шундай тариф берилади: «Давлат ҳокимияти шакллари амалга оши-

давлатни биз бошқарамиз, ўзимиз сиёсат юргизамиз. Ҳа, вазирамиз фақат маҳсулот ишлаб чиқаришдангина иборат эмас. Касбимиз бўйича ҳар куни қилаётган ишимиз рўзгорни тўқин қилиш учун

линган экан. Улар бор йўғи бир кун шу ерда бўлиб, ёшларга мастер-класс ўтказгач яна қайтиб кетибди. Ахир бундан нима фойда бор, ўша пулни «катталар» бирор натижа келтирадиган бошқа ишга сарфлашса бўлмайди?

Дабдурустдан берилган бу саволга дастлаб нима дейишни билмай қолдим. Ўтирганлардан бири бояги футбол муҳлисига "Эй, сиёсатга аралашмасанг-чи" дегач, ўша даврадагилар нотўғри хулоса билан қолмаслиги учун билганимча тушунтиришга ҳаракат қилдим.

Тошкентга бир кунга ташриф буюрганлар дунёнинг энг таниқли футболчилари бўлгани учун ҳар доим оммавий ахборот воситалари ва дунё аҳлининг эътибори уларга қаратилгани, ушбу тадбирдан сўнг дунёнинг энг кучли футбол мутахассислари терма жамоада ишлагани ва натижада ўша йили юртимиз футбол жамоаси Осиё чемпионлар лигасида мамлакат шаънини муносиб ҳимоя қилганини айтдим. Бу мулоҳазаларим даврадагиларга маъқул келди.

Энди тасаввур қилинг, худди шу каби тушунмовчиликлар бошқа соҳаларда ҳам юзага келса-ю ҳар ким турлича фикр билдирса, нима бўлади?! Биз эса ҳали-ҳамон эски гапни қўймаймиз: "Сиёсатга аралашманг!". Йўқ, сиёсатга аралашинг! Бу сизнинг эртанги кунингизни белгилайди.

МУСТАФО МАҲМУД



риш ва бошқариш; давлат ҳокимиятининг мамлакатни бошқарувда ва халқаро муносабатларда тутган йўли; давлатни бошқариш санъати».

Сиёсий ҳаётимизнинг кичик бир бўлаги маҳалла бўлса, унинг раисини ўзимиз сайлаймиз. Олиб борилажак ишлари, тақдим этган режаларига қараб депутатларни сайлаймиз ва худди шу тарзда қонунчиликдаги ўзгаришларга ҳам ҳиссамизни қўшамиз. Давлат раҳбарини ҳам ўзимиз сайлаймиз. Демакки,

бўлса, фуқаро сифатидаги ҳаракатимиз юрт тўқинлиги, фарзандларимиз эртаси учун. Шундай экан, "сиёсатга аралашмасанг"да қандай мантиқ бор?

Ҳаётда кишилар ўртасида рўй берадиган турли хил тушунмовчиликлар ва ҳатто норозиликлар ҳам баъзан сиёсий саводсизликдан келиб чиқиши ҳеч кимга сир эмас.

Буни оддийгина, ҳатто сиёсатдан узоқроқ бир мисол билан ҳам кўрсатиш мумкин. Анча йил илгари қишлоқ меҳнатқашлари билан суҳбатлашиб ўтиргандик. Гап футбол мавзусига ўтганда даврадагилардан бири шундай савол бериб қолди:

— Эшитишимча, яқинда дунёнинг энг кучли бир нечта футболчиси катта маблағ эвазига Тошкентга таклиф қи-

обдон суҳбатлашди.

— Бир гектар ерим бор. Шунинг 30 сотихини сотаман, — гапнинг дангалини айтди раҳбар-боғбон.

— Йўқ, ака, — деди унга эътироз билдириб Мирзоалим. — Сотсангиз, майда-чуйда қилиб ўтирмай бир йўла ҳаммасини сотинг! Қанча сўрайсиз?

Бунақа дангалчи харидорни доим ҳам учратавермайдиган Нозимжон Жамолов шошиб қолди ва бир гектарнинг ҳамма-

Асакалик, бугун-эрта қирқ беш-элликни қаршилайдиган Нозимжон Жамолов нима бўлди-ю, хатоликка йўл қўйди. Уч нафар фарзанднинг отаси, тупна-тузук бу шахснинг адашиши қимматга тушди. Қилмиши учун жиноят ишлари бўйича Шаҳрихон туман суди унинг масаласини кун тартибига қўйди. Бироқ томонларнинг ўзаро ярашуви туфайли иш тўхтатилди. Нозимжон энди эмин-эркин нафас олиб турганда бошқа бир кирдикори чиқиб қолди-ю, эндиликда уни жиноят ишлари бўйича ўзи туғилиб-ўсган Асака туман суди сўроққа тутди: нима қилгансиз, қаерда адашдингиз?!

Ҳа, инсон боласи бир адашмасин, агар ўзини тез ўнгласа, созланса, нур устига нур, йўқса, у ёғи маълум: "ўзбошимчани" қонун қулоғидан тортишга, тартибга чақиришга, қилмишига яраша адолат танбеҳини беришга мажбур бўлади. Бу гал ҳам шундай бўлди — гувоҳлар, ҳужжатлар, суриштирувлар натижасида Нозимжоннинг айби сув бетига кўпикдек қалқиб чиқди. Бўстон туманида масъул лавозимда ишлайдиган Нозимжон Жамолов фақат мойнага қараб турадиган кимсалар тоифасидан эмас эди: у бўш вақтида боғдорчилик ишлари билан шуғулланарди. Ўзи яшайдиган туманда фермер хўжалиқларидан бирининг ерини ижарага олиб, шартнома асосида мевазор боғ ташкил қилганди. Бу боғнинг мевалари сархил, кўрган кўз раҳбарнинг миришкорлигига ҳам қойил қоларди. Кунлар бир зайлда ўтиб турган кезде, "шовур-шувур" гап оралаб қолди: нима эмиш Нозимжон Жамолов боғини сотиш учун харидор излаб юрганмиш! Ана холос, бу ёғи қанчадан тушди энди, ажабланишди бу гапни эшитганлар орқаворатдан гуллаб турган боғни сотиб нима қиларкин? Боғ қилиш осонми? Бир туп мевани кўкартириб, етилтиргунча она сутимиз оғзимизга келади-ку, гоҳо! Қара, парвариш қил, ўғит, сув дегандай...

Айримлар эса одатдагича, менга нима сотадиган у, оладиган бошқа деб қўл силтаб қўяқоларди. Ҳайтовур, шамол бўлмаса, даракнинг учи қимирламайди. Гап чиқдим, демак, остида бир нимкоса борлиги тайин.

Илдизини суриштирсак, тадбиркор Мирзоалим Асронқулов кунларнинг бирида тадбиркорлик фаолиятини ривожлантириш мақсадида ер майдо-

ни излай бошлади. Асакага бориб, ундан-бундан сотиладиган ер бўлса, оли-



шини дараклади. Албатта, унинг нигоҳи бир ёқда узум, бир ёқда шафтоли яшнаб-ярақлаб турган боққа ҳам тушди. Бироқ, бу боғни эгаси бўлмиш Нозимжон Жамолов уни сотиб юбориши етти ухлаб тушига ҳам кирмаганди. Одамлар кутилмаганда Нозимжон Жамолов ер сотмоқчилигини харидорга маълум қилиб, ўзингиз кам-кертганини бир сўрайсиз деб унинг рақамини беришди. Нозимжон Жамолов харидор билан гаплашгач уни ўз ишхонасига — Бўстон туманига таклиф қилди. Енгил машина ортидан чанг қолдириб, бир-бир ярим соатлар чамасида белгиланган манзилга етиб бориб тўхтади. Нозимжон Мирзоалим билан

сини 55 минг АҚШ долларига пуллашини маълум қилди. Сизга арзонроқ қилиб бераман, дея қўшимча қилди "сотувчи" қаршисидаги шахснинг айнаб, савдодан кечишидан чўчиб.

— Яхши, ака, менинг бошимда отам бор. Бориб бир маслаҳат қилай. Сизга натижасини телефон орқали маълум қи-

Таассуф

ламан...

— 40 минг бераверинг, — деди Нозимжон Жамолов яна бироз юмшаб.

Хуллас, бор-барака қилинди. Нозимжон ҳам отасидан бориб маслаҳат ва дуо олди. Савдо 40 ва 45 минг АҚШ доллари теварагида айланиб юрарди. Нозимжон "ўзимники 49 йилга олганман", деган майдонни ўзбошимчилик билан 45 минг АҚШ долларига сотган вақтида жиноят устида ҳуқуқ-тартибот ходимлари томонидан ушланди ва ундан юқоридаги сумма ашёвий далил сифатида олинди. Кўриб турганингиздек, бу савдо гайриқонуний фермер хўжалиги раҳбари розилигисиз, ими-жимиди амалга оширилгани боис Нозимжон Жамоловга барака келтирмади. Аксинча, унинг қонун олдида жавобгар, ўз яқинлари олдида хижолат бўлишига олиб келди. Начора, бунга унинг ўзи айбдор. Жиноят ишлари бўйича Асака туман суди унинг хатти-ҳаракатларида жиноят кодексигаги маълум модда ва бандларда назарда тутилган жиноят аломатлари борлигини ўз очиқ суд мажлисида таъкидлади. Текин даромад топишни кўзлаган Нозимжон Жамолов қилмиши учун қонун ҳукмига кўра, 87 миллион 710 минг сўм жарима жазосига тортилди. У бу ҳолдан хулоса чиқариб, бундан кейин ўйлаб ва етти ўлчаб қадам босса, ажаб эмас!

Нодирбек АБДУСАТТОРОВ,
Иқтисодий жиноятларга қарши курашиш Департаменти вилоят бошқармаси катта инспектори,
Икромжон Мансуров,
журналист



Ушбу саҳифа Олий Мажлис ҳузуридаги Нодавлат нотижорат ташкилотлари ва фуқаролик жамиятининг бошқа институтларини қўллаб-қувватлаш жамоат фондининг "Жамият — ислоҳотлар ташаббускори" Давлат ижтимоий буюртмаси асосида тайёрланди.

ҚИСҚА САТРЛАРДА ЎҚИҲ!

Республиканинг барча туман (шаҳар)ларида юридик хизмат кўрсатиш марказлари ташкил этилади.

